

حمدى رمضان  
( أبو عمرو الريشى )

# موت بطيء

أشعار بالعامية المصرية

الطبعة الأولى ٢٠١٧



حمدى رمضان ( أبو عمرو الريشى ) □

## بطاقة الكتاب

عنوان المؤلف :	موت بطيء
المؤلف :	حمدى رمضان ( أبو عمرو الريشى )
التصنيف :	أشعار بالعامية المصرية
رقم الإيداع :	2017-28622
عدد الصفحات :	100 صفحة
رقم الإصدار الداخلى :	44
تاريخ الإصدار الداخلى :	2017 / 12 طبعة أولى
الإشراف العام :	الشاعرة سميرة محمودى

جميع حقوق الطبع والنشر محفوظة للشاعر، ولا يحق لأى دار نشر طبع ونشر وتوزيع الكتاب الا بموافقة كتابية وموثقة من الشاعر

### دار النيل والفرات للنشر والتوزيع

ثورة مصرية تشرق إبداعا على الوطن العربي

رئيس مجلس الإدارة  
**ناجى عبد المنعم**



رخصة مزاولة مهنة: 58365 - سجل تجاري: - 2017 / 13242 - بطاقة ضريبية: 35-01-572  
عضو عامل باتحاد الناشرين المصريين رقم 941 لسنة 2018  
هاتف: 01011256943 - 01116202218 - 01202541192 تليفاكس: 020554372901  
alnilwaalfourat@gmail.com alnilwaalfourat  
[المنقر الرئيسي: ج.م.ع. محافظة الشرقية - العاشر من رمضان - مجاورة 13 - أمام سنتر الـ 13 - قطار 304]

# الإهداء

إلى كل من

أهديته نبضي وإحساسي

فأهداني جرعات هائلة

من الألم والوجع

إلى كل عشاق الحروف والكلمات

إلى أولادي وأهلي وأساتذتي

الذين ساندوني ولو بحرف في

رحلة الإبداع التي لا تنتهي أبدا

إلى كل من

ساعدني في الوقوف

بأقدام ثابتة على طريق الإبداع

أقول للجميع أشكركم من القلب

وأهدي لكم ديواني الأول ... بعنوان ( موت بطيء )

حمدي رمضان ابو عمرو الريشي

# موت بطئ

لا عايش ولا ميت

حسيت معاك بإحساسي

بأنفاسي لما بتتسرق مني

لا راضي الموت

ياخد روحي ولا يسبني

معاك بموت موت بطيء

بياخد كل أفراحي

بيبدل فرحتي حزني

وأنا وياك

بموت في اللحظة

ميت موته ومستني

معاك عايش

بس مش عايش



وخايف تبعدني عني  
وجمع كل ده في إحساس  
لو أتسبب في أحزانك  
ياااااه يغور الحب  
لو أتسبب في أحزانك  
أكيد عارفه  
وأكيد فاهمه ومش مني  
فلو سبتك  
راح يكون أكيد موتي  
ولو عشت واخترتك  
راح يكون وأنا عايش  
موت بطيئ بيألمني  
فاسامحيني يا أجمل حب  
راح أبعد وأنا عارف

وأنا في بعدك  
أكيد راح أموت موت بطيئ

# فايتتي لمين

مليش غيرك بيفهمني

ولا غيرك بيحزن لي

لو يوم تلاقى قلبي حزين

فايتتي لمين...

ومين ينور في قلبي الضي

لو غاب بكرة

من عيني وقال مش جي

ومين يرسم أحلامي

في كل أذان

ومين يسعد بنات الحي

فايتتي لمين..

ومين غيرك هيسمعني

وفهمني من غير ما أقول  
فهمني بس كرهت غناي  
ولا نسيت دموع عيني  
نسيت حبي وبكرة الجاي  
خلاص ماشي وفايتني  
خلاص هانت دموع عيني  
فايت لحظة جوايا لأجمل حب  
تعالى خدھا فايتها ليه  
ما حزن بحزن  
وايه فاضل هنبكي عليه  
خلاص قدرت تنساني  
ونسيت عشرة بقالها سنين  
فايتني لمين ..  
مليش في الدنيا

غير حبك فامتسبنيش  
بلاش تقطع  
كل الود ما بينا ماتخسرنيش  
خليني جوه إحساسك  
إن حبك فهمني  
بعدك ازاي أعيش  
وازاي اصبر سنين عمري  
وأنا عمري  
مادقت الحب غير وياك  
فاسامحني يااضي العين  
كفاية أعيش  
العمر من غيرك وقلبي حزين  
فايتني لمين ..  
يامتحكم في إحساسي

ياحب سنيني  
ياواخذ عقلي من راسي  
ياسارق مني  
أحلامي في عمري الجاي  
يانعمة في  
قلبي مشتاقة يا صوت الناي  
لنعمك بكتب إحساسي  
ولو ناسي قوليلي  
بس من بعدك  
أروح على فين  
فايتني لمين

# ناس وناس

ناس وناس في دنيتنا  
عارفين أسرارنا وحكايتنا  
يموت القلب لو غابوا  
وتهون عليهم عشرتنا  
وناس تتمنى خطاويننا  
ونبعد عنهم بايدينا  
بنجرحهم ومش قاصدين  
وما نشوفهمش بعينينا  
وناس تعدي ما تسلم  
وناس بسكوتها تتكلم  
وناس لو لقيوا لحظة حب

تسرق قلوبنا ما تعلم  
وناس قلوبها مليانه  
بطعم الحب عمرانه  
وناس لو جيت تحاسبها  
أعمالها طالعه خسرانه  
وناس في الفقر عايشه  
وناس في طريقها ماشيه  
وناس في ليل شتاها  
في عز البرد سهرانه  
وناس في حياتنا كدابه  
وناس في اللسته متسابه  
يمكن بكره يجيها الدور  
وهي دنيا ودائره بغرابه  
وناس حسدانه في كلامنا

وناس بتسرق أحلامنا

ولا يهملها دنيا

ولا حساب يوم القيامة

ناس وناس في دنيتنا

# بتونس بيك

زي ماقالت

ورده في غنوة

أنا بتونس بيك

زي الضحكه وزى الدمعة

أنا مشتاق لعينيك

أنا مشتاق

والشوق دوبرني

بس ياروحي هواك عذبي

بحلم بيك في

نهاري وليلي

بين أحضائي بس ألاقيك

أنا مشتاق لعينيك

مشتاق إني ألمس إيديك

أسمع صوتك أبقى وريدك  
أبقى الدم النابض في الشريان  
ما أنا مشتاق  
والشوق في بعادك كله نيران  
بحلم إنك  
تبقى معايا  
تبقى فرحي وتبقى هنايا  
تبقى يا عمري  
النور لسمايا  
كل حياتي تنور بيك  
زي ما قالت  
وردة في غنوة  
أنا بتونس بيك

# ماشى

من غير ما تفكر

واخذ قلبي وروحي معاك

فايت حبك

جوه في قلبي

فايت ضحكه

فايت دمعه بتترجاك

خليك فاكر

قبل ما تمشي

أنا مشتاق وفاردلك رمشي

أنا من شوقي

جفتي ما نمشي وبستناك

بستناك في نهاري وليلي

بستاك يا حبيبي تجيني  
بحلم لو كان باقي  
بعمرى يبقى معاك  
ببقى معاك  
وأشتاقلك تاني  
وأنسى الدنيا  
وأنسى زمانى  
وأنسى إنك دايمًا تنسى  
تجرح قلبي وأنا بهواك  
أنا بهواك وربنا شاهد  
على إحساسى  
ولغيرك زاهد  
راضى بحبك أه يا حبيبي  
وبحلم أبقى قمر فى سماك

ماشى  
من غير ما تفكر  
واخذ قلبي وروحي معاك

# سألتني

سألتني سؤال

ملوش جواب

بتحبنى ليه؟

رديت وقلت

قلبي اللي حبك

من زمان روعي إسألينه

روحي قوليه

ياقلب عاشق

وسط الضلوع ازاي عشقت

وازاي هويت

أميال ما بينا

وبلاد بعيده

ازاي على قلبى ناديت  
وازاي سمعتك  
وازاي عشقتك  
قبل أما أشوفك  
ما تقولي ليه؟  
ياقلب مليون بالحنان  
ما تسألينى ازاي وليه  
أنا حبي ليكي  
مش محتاج سؤال  
ما فيش إجابته تتفهم  
أورد واضح للسؤال  
أرواح تلاقت في الفضا  
والله تعالى  
في كتابه قال

( الطيبون للطيبات )

أهم حاجة إننا

عاشين لبعض بدون آهات

وماتسألش ازاي وليه

كل الحكايه

أنا قلبي داب

وأنتي سؤالك يا حبيبتى

ملوش جواب

لو عندك إجابته للسؤال

ابقي إسألني قلبك عليه

# ساعات

ساعات أتوه  
في إحساسي  
وأتمنى أكون  
في يوم جنبك  
ولا عارف ولا فاكر  
غير بس مشتاق وبحبك  
وساعات  
الشوق يدوبني  
وساعات الدمع يغلبني  
وساعات أشكي  
وساعات أبكي  
ولا عارف أنا ليه يبكي

عائش بس مش عائش  
تعبت كثير من بعدك  
ومن بعدك تعبت خلاص  
وطال ليلى  
ومن هجر بقيت  
عائش بدون إحساس  
وألف سؤال  
جوايا بيأسأني  
وألف إجابہ  
محذوفه جوايا  
بتقولك ليه هجرتيني  
بتقولك ليه تنسيني  
وليه سيباني وأنا مشتاق  
وبعدك نار تعذبني وتكويني

محتاج إحساسك  
ومحتاج حبك يدوبي  
ومحتاج رد لكل أسئتي  
ليه لما أحبك كل الحب تتسيني

## ظلمك ليا

وظلمك ليه مالوش آخر  
وعايز ليه تصافيني  
وكنت زمان حبيب غالي  
وكان حبك منى عيني  
وكنت تقول وبسمعك  
وكان قمرك بيهديني  
ونبضك كان باحساسي  
وعشقك نهر يرويني  
زرعت البعد في قلبي  
طرح أحزان تواسيني  
كرهت الدنيا والأيام  
كرهت الحب وسنيني

كتبت البعد والحرمان  
سطور موجوعه ترثيني  
وبعد دا كله جاي بتلوم  
وبتكتب شعر تشكيني  
بلاش تظلمني ياظالم  
كفايه الحزن ماليني  
كفايه هعيش من غيرك  
ونار في القلب تكويني

# أهون عليك

تجرحلي قلبي  
وأنا روعي فيك  
لو كان دا ذنبي  
حبك في قلبي  
تعالى واقتل  
حبك بإيديك  
أهونة عليك ....  
تعالى ماتخافشي  
اقتل وروح امشب  
وإن كان على قلبي  
راح يبكي برضه عليك  
أهون عليك ...

ياللي تعابني هواك  
بعدك على عيني  
طب أعمل إيه وياك  
في أيامي وسنيني  
تعالى ما تخافشي  
فارد أنا رمشي  
تعالى يا حبيبي  
أنا روجي ملك إيديك  
أهون عليك ...

# الكبير

الكبير مش بالكلام

الكبير كبير القدر

الكبير كبير مقام

أوعاك تقول

عشان كتبت كلمتين

تبقى خلاص بقيت كبير

تبقى خلاص بقيت تمام

أوعاك يا ولدي

تقول بقيت

أوعاك يغرك الكلام

أصله رخيص

وقبلك ياما انقال كلام

خليك راجل

خليك كبير

أصل الكبير عمره

ما كان بياع كلام

الكبير بيلم

كل الناس في قلبه

ينصف قلوب المظلومين

أصله وطبعه راجل همام

أصله الكبير

لازم ياولدي

وسط الرجال تكون راجل

ومش أي راجل

راسك تناطح في الغمام

أوعاك تبقى

في يوم هفيه  
أو تاكل لقمة م الحرام  
خليك كبير العقل  
خلي قلبك للجميع وطن وسلام  
ماتقولش

دايما كلمتك تمنها كام  
وأوعاك تصاحب الخسيس  
اصل الخسيس طبعه كده  
دايما ياولدي يبيع كلام  
الكلمة عنده بأرخص تمن  
وإن جار عليك مره الزمن  
أوعاك تخاف  
خلي الظروف الصعبة تظهر معدنك  
ومهما تشوف في دنيتك

خليك رمز للسلام  
خليك يا ولدي كيف الحمام  
تشتاق تشوفه كل يوم  
ومهما يغيب  
عن ناسه محفوظ المقام  
طبعه أصيل  
وطبع الأصيل كيف الوطن  
عمره ما قال حبه بكام  
أصله كبير فعله كبير  
مهوش خسيس وبتاع كلام

## عاشق ومغرم

عاشق ومغرم أنا ليكي  
عاشق لنظرة عينيك  
ولو مرة بكون مشتاق  
بتكفي لمسك لإيديكي  
أنا العاشق وأنا والولهان  
أنا اللي قلبي كان ليكي  
مشغل نار كما البركان  
منارة عشق تهديكي  
وقلبي مرسى والشيطان  
ونهر حنان بيرويكي  
ولو قالوا كان ياما كان  
دا سحر الشرق بعنيكي

على مودك أنا سهران  
لو سهري بيرضيكي  
أسهرلك كمان وكمان  
وأكتب شعر لعنيكي  
أعمل إيه وأنا ولهان  
بعمري ياعمري أفديكي

## حبال الود

بيني وبينه موصوله  
ولسه الحب زي زمان  
ولسه الطيبة  
زي ماهي نبع حنان  
ولسه قلوبنا مشتاقه  
تدور على الأمل تبنيه  
مداين عشق محفوظه  
ورغم البعد ما بينا  
ولا تقدر تعيش ليها  
ولا نهارها غير بيهم  
ماهي حالفه  
وهي الحالفه بسنينها

بأيامها ولياليها وأحلامها  
لا يوم م العمر تنسأهم  
وحتى العمر  
لو عدى فداه العمر  
وسنينه ولا تنسأه  
على عهدي معاك دأيمأ  
من أول كلمة ما بينأ  
من أول لحظة في عشقنأ  
عهدتك فيها اصون حبك  
بجبة ملح في العشرى  
تكون حأفظه .ولو نبعد  
تقربنأ وتحفظنأ بحفظ الله .

# أكنش أعميت

في غيابك

كل الصور مقلوبه

ومش حاضره

كأني بشوف ناس تانية

إحساسي بيك مش واضح

كأني أعميت.

ومش شايف

ولا حاسس باي وجود

حكيتك مرة ما صدقتش

وقلت بعدك أنا ميت

وقلت حاجات ومش حاسس

كلامي ازاي بيوصلك

وليه صورتك بقت مهزوزة  
ومش واضحة في عينيا  
أكنش ميت ومش حاسس  
وأنا فاكّر إني. أتعميت !!!  
وليه إحساسك غاب من قلبي  
مع إني عايش لسه وبتنفس  
وروحي خارجه بخروجك  
مع إنك سقيني مرار  
لغنت الحب في وجودك  
وقلت أبعد  
لقيت حبك عاملي حصار  
لا راضي يقول أنا جنبك  
ولا راضي أكون له دار  
بقيت تايه منيش عارف

مفتح بس مش شايف  
حقايق بينا مكسوفه تشوف النور  
وصور بهتانه  
ومش قادرة تعدي السور  
وأنا واقف ومستني  
يمكن أشوف الصورة معدوله  
ولاقي حلمي مش محظور  
جمعت كل المر في ضلوعي  
وقلت أصبر  
أتاري الصبر عدى بحور  
وأتاريني واقف ومستني  
بهتان حلمي جوايا ومكسور  
صور كتير تعدي قدامي  
وإحساس جوايا

مشتاق يشوف النور  
وأنا واقف في مكاني  
مش شايف غير صنم  
شيطان من نار مكتفني  
أتاريه ظلي وأنا فاكرة  
شيطان ماسك في رجليا  
كل حدود المنطق أنا عديتها  
وكنت بقول أنا بيك أكتفيت  
لكني حاسس دلوقتي  
مع وجودك مع إنك قدامي  
بس مش شايفك  
يمكن أكون بقيت ميت  
ويمكن أكون مع وجودك  
أنا حي بس أتعमित

# يا آه

اه ومكبوته  
وسط الضلوع حواديت  
ياسكه مشروطه  
نمشيها بالمواعيد  
شبعنا منك مر  
اختشي كفايه  
احنا يادوب  
بنعدي من بعيد لبعيد  
مادقتش فيكي  
غير طعم الوجع  
وراضي بقسمتي وسعيد  
يا صاحبة العصمه

قوليلي لو تسمحي

إيمتا يجيني العيد

# طول عمري

أعلم قلبي ازاي يصبر

وازاي يقدر

يخلي الصبر عنوانه

عشان لو ضاع

في يوم حلمه

يعيش بالصبر أيامه

كتير بضيع أحلامنا

ما بين غربه

وفراق أو غدر

فعلته

ازاي يصبر وازاي يقدر

يملى كل أركانه بملح الصبر  
ويحلم تاني حلم جديد  
تكون فيه ليلة قدر  
تحقق كل أحلامه  
وبلاش م اليأس  
وبلاش م الحزن لو تقدر  
أدام علمته  
يدوق الصبر راح يصبر  
فلما جيت أدوق الصبر  
لقيت روعي بتقطع  
نسيت في الزحمة عنوانه  
لقيتني بموت ميت موته  
في كام لحظه  
مشهد صعب يتكرر

ونسيت كل اللي تعلمته  
ونسيت في لحظة طعم الصبر  
وأنا اللي طول عمري  
أقول الصبر عنواني  
وكان الصبر بيهواني  
وأحفظ نفسي ازاي أصبر  
فمعرفة تش ومقدرتش  
ازاي في غيابك  
أكذب روعي وأقول أصبر  
لاني أكيد هكون بكذب  
ومش هقدر  
وازاي اصبر وازاي أنساك  
وتبقى بعيد عن عيني  
يغور الصبر

ويغور كل اللي تعلمته  
سامحني مش هقدر  
أقول أنساك  
يغور الصبر مش هقدر

## إكتبيني

في ليل عيونك  
وفي جفونك أغلى دمه  
لما تنزل  
تبوس حدودك  
لما توصل بين شفائك  
راح تدوق طعم الشفايف  
طعم شهد الله يصونك  
واعشقينني  
قد عشقي من سنين  
تعبت جدا م الألم  
ومعاك بحس بالحنين  
مش شخص

مخلوق م العدم  
لا يوم حلت بالفراق  
ولا حبي مرسوم كالصنم  
يعبد عباده

## وصيتي لإبني

عاهدني يا بني تصون ودك  
تحافظ يا بني على عهدك  
تشيل الحب في قلبك  
عشان إيمانك كده بربك  
زرعته فيك فامتخفش  
فمهما تغيب راح ترجع  
تلاقي الناس بتحبك  
لإتك أمين على عهدك  
لا يوم بتخون من خانك  
ولا يوم قصرت في جهدك  
راجل وخايف على بلدك

تموت حر فدى ترابها  
ولا تعيش جبان الزل بيهدك  
علمتك يابني تدوق الصبر  
فخلي الصبر في قلبك  
يكون طاعه كده لربك  
وفي كل صلاة تدعيها  
دي بلدنا يابني وتستاehl  
تموت فدى طين نيلها  
زي جدود جدود جدك  
واوعى يابني تزعل أخوك  
لوزعل الأخ هيهديك  
قرأنك شيله في صدرك  
ولو حسيت في يوم مخنوق  
أقرا صلي راح يزيل همك

وحسن يابني في أخلاقك  
وحب الناس من قلبك  
تلاقي الناس بتحبك  
وصيتك يابني بوصيتي  
أوعاك تنسى  
محدث بعدي راح يوصيك  
ولما أموت تدعيلي  
وتوصي إبنك وصية أبوك  
هي يابني ميراثنا من جدك

## سبيني

أكتب في عيونك  
ميت قصيدة غزل  
وأزين بأسمك  
م الحروف دواوين  
مجروحة  
وناقصه شهادتي فيك  
ازاي تبقي عايشه  
جوه نبضي وأوصفك  
ازاي تبقي جوه قلبي  
وبين ضلوعي ولا أعرفك  
ازاي تبقي في عيوني

وأشوف مكانك وحده ثانيه  
ماهو لو شفت غيرك  
أكيد مايكونوش عيوني  
لسه عهدي معاك باقي  
بين السطور  
بينزف عشق ما نشفش  
حالف بالف يمين ماأنساك  
ولا أخلف في يوم عهدي  
وأكمل دنيتي وياك  
مهما قلت كتير عنك  
مهما وصفت كتير فيك  
لا هقدر أوصف جمال حبك  
ولا إحساسي وأنا وياك..

# شافوني

شافوني بكتب ع الهوى والعاشقين  
قالو دا مغرم صبايا مين زيه مين  
كل حروفه بتوصف جمال حبيبته  
وقلبه العاشق صبابه مليون حنين  
أنا قلت قولوا وعيدوا لو تشوفوني  
وتسوفوا وجعي يا غيرنين  
أنا كنت عاشق لكن عيوني  
بدمع عيني كانوا مليونين  
الضحكة غايبة والنظرة شاردة  
وانت يا قلبي بقيت حزين  
أنا كنت فاكر الحب جنة

جواها هبقى ياناس سنين  
أنا وحببي ما نشوفش دمعه  
اتاريها جنة ما بين نارين  
نار العوازل واللي لامونا  
وغيره حبيبي أه وأهين  
لو شفتوا قلبي واللي جراه  
مش هتلموني وتبكوا سنين  
شايه حروفي وجعي معاها  
حتى ف غنايا قلبي حزين  
أنا كنت عاشق مغرم صبابا  
وزي كثير م العاشقين

## لوح تلج

وبتسأل لا متسألش  
بطلت أجاب على أسألتك  
أدام ما قلت ازيك  
وظمني بتسأل ليه  
روح ابعده بلاش تسأل  
عودت قلبي على غيابك  
وداق لوعة الحرمان كثير منك  
مع إنك واخذ غرفتين جواه  
ساكن يعني ومتمكن  
بدون اجره. بدون إحساس  
داخل وخارج من بابيه  
بدون تأشيرة تحت سماه  
وأنا صابر وأقول يعقل

بس من كتر  
ما سامحتك وصدقتك  
بقيت في ليلى أقول الأه  
وبأعلى صوت ليا  
مش قادر أتحمل  
ازاي تكون جواليا  
ومش حاسس بوجع قلبي  
وكلمة أه بتقطع كل شئ فيا  
بتخرج من ضلوعي نار  
بتحرق كل اللي حواليا  
ومش حاسس ولا شايف  
عذاب قلبي  
وتقول أغلى ما ليا  
ومش حاسس ولا شايف

دموع عيني  
وجاي تسأل حبيبي فين  
قبل ما تسأل  
قول مالك حبيبي طمني  
حزين قلبك وإيه غيبك عني  
كلامك كان يزيل همي  
وأرد وأقولك ليه أنا موجوع  
حلمت إنك تكون أجمل أيامي  
وصحيت لقيتني أنا مخدوع  
كنت فاكرك تحس بيا  
قبل ما أقول الأه  
مش إنت ساكن جوه قلبي  
وكل لحظة معاه  
بس ياخسارة

لقيت إحساسك نبض بارد

زي لوح الثلج

لما يبقى جوه ميه

كل ماده يزيد بروده

وكل ماده ينقص شويه

أنت زي لوح الثلج

جوه قلبي بردت حبي

وخلتني بدون إحساس

مليش نفس أقول سلام

ولا أرد حتى السلام

وبدون كلام

راح أقول دا الختام

خلاص أنا قلبي مات

اخرج منه وكفايه..

## نقطة

نقطه من أول الهم  
لما بفرح بلاقي الفرحة  
ممزوجه بطعم الحزن  
مش لاقى وصف  
جوايا للون الفرح  
دموع تنزل وأنا فرحان  
وضحكه مليانه بكل الحزن  
وبين الفرح وأحزاني  
أنا عايش بقول  
يمكن يسيبني الهم  
في وسط الزحمة والزيطه  
والأقي شروق لأيامي

شعاع من نور حواليا  
ينور فجر أحلامي  
سنين عايش وأقول أصبر  
أتاري الصبر مش صابر  
وراكن ضهره ع الحيطه  
بيتوجع وحاله يغم  
سنين الحزن  
مشتاله لبعده مامات  
وجوه القلب  
عمال أغزل كتير حكايات  
ياسارق م السنين فرحي  
وعامل روحك مش شايف  
بكام الفرحة بتبيعه  
وأنا شاري وزى ما تقول

ماهو مش معقول  
أعيش العمر وأنا  
مليش في الفرح ولا لحظه  
وعامل م الأمل مجداف يعديني  
ولما أوصل لأخر الحزن  
أعيد الكره م الأول  
ياسارق م السنين فرحي  
كفايه شبعت م الأحزان  
مستني لحظة فرح  
ولو عابره تكون عنوان  
تقول للحزن بقى كفايه  
مشتاق أدوق الفرح لو لحظة

## شبعان وجع

شبعان وجع ماتكملوش  
موتي بسكات  
لو هان عليكم حبي يوم  
افتكرو ذكرى م اللي فات  
لو حتى مليانه ألم  
ولا حياتي  
بالنسبة ليكم ماتسويش  
مستكترين الموت  
في جسمي النحيل  
ولا عشان ميت  
وشبعان م الوجع  
يبقى خلاص مليش حياة

وتضيع ما بيننا الذكريات  
وحلم إني أبقى ف يوم ملاك  
مابقاش متاح  
موصوم بكل أشكال الذنوب  
وأضعف الإيمان أتوب  
وازاي دا يحصل  
والعمر آيل للغروب  
والدنيا ملياها الآهات  
ناس همها تسرق حاجات  
وناس طبعها زي الحجر  
وناس في الزحمه  
تسرق قلوب  
وأهي دايره بينا الذكريات  
بين ناس عاشقه للوجع

وناس جواها حزن للممات

والذكرى إيه

غير حبة وجع إحساس ونبض

ونظرة وشوية حاجات

اتنطورت هنا وهنا

وأصبح ما بينا كتير حاجات

تمنع وصول النبض

في شريان الحياة

أشياء كتير مانعه الكلام

رافضه تقول

كان بينا لحظه م الغرام

# كنت بكذب

امسح العنوان

خلاص وفارق دنيتي

قلبي خلاص

اتعود ع البعاد

مابقاش يخاف

مهما تقوله يزيد عناد

اصله خلاص

اتعلم م اللي فات

شبع حزن وكتر آهات

وبقى يدرس الأحزان

وفتح فصول

تقويه للمجروحين



يعني خلاص  
القلب أتعلم على إيدك  
ازاي يشوف  
الأسوه جوه عينك  
دايما الاحزان  
تعلمنا نكون واضحين  
ومهما تعلق  
موجه الحزن نركبها  
ونبقى فوقها مش خايفين  
مش لاقى كلام  
عشان أوصف مرار هجرك  
غير إني بقيت عايش  
بدون إحساس  
وده تحسه في كلامي

في كل حرف  
من حروف شعري  
اللي بكتبها وأكيد مش ليك  
لان إحساسي مش فيها  
ولا حروفي بتبكي عليك  
ولا برضه هتبقى  
في يوم لقلب غير قلبك  
سامحني أنا بكذب .....  
وكل حروفي مكتوبه لك  
هزاني الكلمة من جوه  
في عز عذابي بشتاق لك  
وبندهلك بعلو الصوت  
محتاج حضنك الدافي  
وقبل ما تنسى كلماتي

ياريتها تموت ولا تنساك.

ولو نسيت

أفكرها بكام دمعہ

بكام كلمه

بكام ذكرى وتتهيده

أفكرها بأحلامنا

بأيامنا اللي عشناها.

وتنسى ازاي ؟

ماهي لو نسيت

ساعتها ممكن أكون ميت

وممكن أكون وانا ميت

أكون فاكرك ومش ناسيك

لأنك حتہ من قلبي

ازاي بس صدقت

ولو بالكذب إني أنساك  
سامحني أنا بكذب  
وبقول لروحي أنا نسيته

## اشتقتك

اشتقت اضمك  
بين ضلوعي واحضنك ..  
عايز الحنين  
اللي في قلبي يوصلك ..  
ياأعلى  
من كل الوجود  
ياحب  
غالي ملوش حدود  
لو غبت عني  
يادوب ساعات  
بلاقي قلبي يحنك ..  
آاه ..... اشتقتك ..

# وكاااان

كان ياما كان

كان ليا قلب زمان

لا بيعرف الأسيه

ومليان بالحنان .. وكاااان

كان لما تغيبوا

إحساس غريب يجيبه

وعمره ما حس بأمان ..

وكاااان

كانت ضحكة قلوبنا

ماليه الافراح دروبنا

ومنوره المكان .. وكاااان

كانت تنده علينا  
وتقول ياتور عينينا  
يا منورين قلوبنا  
مشتاقه للحنان .. وكاااان  
دلوقتي بعدتوا عني  
وبالاحزان بغني  
وبقول ياريتكوا جنبي  
وبشكي للزمان ... وكاااان  
كان ياما كان  
كان ليا قلب زمان  
لا بيعرف الأسيه  
ومليان بالحنان .. وكاااان

## لما تضحك

ضحكتك بتهز قلبي

لك كثير وانت مكشر

طب خلاص

يا عم اضحك

ما أنت لما تكون

مكشر أكيد راح أزعل

وافتكر انك مخاصم

وافتكر انك هاجرني

طب بلاش

فاكر لما قولت

هبعده إيه حصلي

ولا قلبك بس فاكر عني يبعد

كنت عايش

بدون وجودك وكأني ميت

كل لحظه من حياتي

بدون وجودك

مع إني عايش بس ميت

ولما قلبك فاق وقرر

قررت إني أعيش وجودك

يلا اضحك

خلاص مسامحك

ضحكتك نبض حياتي

ضحكتك بتهز قلبي

# راحل

قبل ما أقول أنا راحل  
هقولك كلمة في ودانك  
بحبك. بس مش قادر  
اكون في الحب عنوانك  
ولا ينفع أكون عاشق  
وابقى غريب ف أوطانك  
عشان كده قررت ابعده  
وأنا مشتاق لأحضانك  
فسامحني يانبض القلب  
مفيش غير حل هجرانك  
أنا قررت ودي نهايتي  
ونهاية كل أحزانك

يمكن ف يوم اكون ذكرى  
لحلم جميل ف احلامك



## إسم مصر

ولما تسمع أسم مصر  
تعمل لها تعظيم سلام  
مصر يابني أغلى حاجه  
في حياتنا بدون كلام  
يعني لما تقول ولادي  
يبقى نلحقها ----- أوام  
مصر لما تكون ف محنه  
نجيلها طايرين كالحمام  
ياللي بتحبوها فوقوا  
اللي بيحصل دا حرام  
خلوا بالكم منها دايمما  
أرض الكنانه يا كرام

لو نقول هي الأمان  
لونقول حزن الحنان  
تبقى هي مصر يابني  
رمز المحبة والسلام

# إوعاك

اوعاك يا قلبي تحبها

اوعى

يهزك حبها

لو كنت

يوم حنيت ودبت

اسكن

خيالك وابعد

بعيد عن أرضها

خليك

في حالك

ليجيبك

جلطه منها

اوعى  
تقرب  
م الملاك  
سلطانها أقوى  
وأنت يا قلبي  
مش قدها  
تقتل قلوب  
كل اللي  
يعشق قلبها  
خليك بعيد  
او عاك تقرب  
دا الحب  
نار في قربها  
او عاك

يا قلبي تحبها  
دا الحب لعنة  
والبعد نار  
وازاي  
يا قلبي توصف لها  
او عاك  
يا قلبي تحبها

## من غير عتاب

سيب الجراح في  
القلب خليها تنزف دم  
من غير عتاب راحل  
ما تشلش لحظة هم  
ياللي قلبك حجر  
ساييني ليه في الغم  
لو خوفي عليك زعلك  
ما عدش أخاف ياعم

# أحلام القلب

احلام القلب

بتتشعلق بحبال الليل

عماله تغني من

شوقها وتقول مواويل

مرسومه أحلامنا

في دنيتنا رسمة تساهيل

والحلم الضايح

على نفسه محتاج لدليل

وخدانا الدنيا من

روحنا وموالها طويل

تايهين جواها

في دروبها زي الدلايل  
نجري ونعافر  
في سباقها كسباق الخيل  
ماهو مش معقول  
نعيش فيها من غير تفاصيل

## لاء

لاء مش دموع  
حبة تراب داخله العيون  
متسببه في كل الألم  
حتى الرموش صابها العمى  
سابت تراب الذكريات  
يدخل ويدبح في الجفون  
نازله الدموع زي المطر  
متسرسبه وازاي تهون  
وأنت الحياة  
لو كنت فاكر إني  
أنسى حبك أكيد ظنون

# أنا والحروف

أنا والحروف

حتى وأنا

مليان وجع

ناحت قصيدي

جوه قلبي ورافض الكلام

رافض شروط الإنهزام

شاييل حروف القصيدة

فوق كتافي

من يوم ما وعيت ع الدنيا

وعاهدت نفسي

وحالف لوفي بالقسم

باني جدار عالي لقصيدتي

زي بنيان الهرم

لا سمح الله

لحد يغلط في الحروف

يدخل وما يسميش

وما يصليش كمان عليه

أنا أصلي بإيديا بنيه

محروس ومحمي م الإله

زي بنيان الحرم

يعني لما تدخل للحروف

سمي وصلي ع النبي

وقول ماشاء الله عليه

ناظم قصيدة للحروف

وسايبنا بنموت ياولد

طب قول قصيدة للولاد  
أو قول قصيدة للبلد فيها غزل  
تحنن قلب المسئولين  
على شعب بيكح التراب  
وحالته أعجب م العجب  
يابوي خلينا بعيد السياسة  
لو هناكل عيشنا حاف  
صحيح فيه ناس  
مش لاقية للرغيف  
وناس في برد الليل بتحلم بالدفاف  
يابا خلاص  
ماهي بقالها  
م السنين مليون سنه  
سرقه ونهب م الخزائن

لحد قال ليهم كفايه  
ولا يوسف الصديق زعل  
فرعون حاكمها م الأزل  
والشعب تحت رجليه خدم  
كما العبيد ومش جديد  
خلينا بالله يابوي نعيش  
فقدت م الولدان كتير  
وما عدش فيك الحيل  
تغني وتقول يا ناعسه انهضي  
ناعسه خلاص  
رابطه ولادها بالحديد  
ومجهز الهم الكفن  
عشان مولانا الفرعون يعيش  
لازم يموت نص البلد

واللي مش عاجبه الحال يغور  
واقفين في وش الموت طابور  
فاكر يابوي ابن اخوك محدين  
وهو جاي في القطر مات  
وآبن عمي الشاويش محمد  
ع الحدود طخوه ومات  
ومينا آبن غبريال  
جوه الكنيسه فجروها  
وبرضه مات  
حتى لما قلت أشجع  
وأنسى همي في الملاعب  
شفت موتي وصاحبني اللي  
كان بيشجع جنبي مات  
ومحروس ولد الشيخ عطيه

لما ضاق الحال وهاجر  
غرقت بيه المركبه وفي البحر مات  
وناعسه نايمه  
مش حاسه بولادها اللي بيموتوا  
ولا حاسه بالسوس  
اللي بينخر عظمها بس بسكات  
وعايزني أقول الشعر فيها  
وأغزل حروف الفرخ في الموالم  
يا با خلاص الحروف تمت حزينه  
والصبر فوق الصبر طرحه مال  
وأنا خلاص  
معدش فيا الحيل لضلمة سجون  
جواها الموت أصبح حلال  
جواها الموت أصبح حلال

# راضي

راضي

بنصيبى وقسمتى

والعمر عدى وراح

بين الهموم والألم

صابر وكلي جراح

صابر على قسمتى

راضي وبالمكتوب

تنشف يوم دمعتى

تلاقي سمايا غروب

ومهما تعملي فيا

راضي وصابر وحبك

ع الجبين مكتوب

وروحى فدى عيونك  
ليه لما اقول بعشقك  
ترميني في سجونك  
ماليه قلوبنا جراح  
وعمري ما أخونك  
طالب رضاكي سماح  
يا حبيبتي وأصونك  
فارد رموشي براح  
شيلي بقى ظنونك  
ضميني ضمة موت  
وخذيني ف أحضانك  
ومهما تعملي فيا  
راضى وصابر  
وروحى فدى عيونك

.....

عدي جراح الجسد

والقلب فيك دايب

برقيك وخايف م الحسد

والظلم مش غايب

هي العدالةه فين؟؟

ومالك ليه سايب

الفقر باين ع الوجوه

والحلم بقى غايب

بيعانا ليه بالرخيص

بعد اما كنا حبايب

وطن مليون بالجراح

والشعر فيه شايب

ومهما تعملي فيا

راضى بنصيبى  
بحبك والقلب فىك دايب

.....

## محتوى الكتاب

صفحة	المحتوى	م
2	بطاقة الكتاب	1
3	الإهداء	2
4	موت بطيء	3
7	فايتنى لمين	4
11	ناس وناس	5
14	بتونس بيك	6
16	ماشى	7
19	سألتنى	8
22	ساعات	9
25	ظلمك ليا	10

27	أهون عليك	11
29	الكبير	12
33	عاشق ومغرم	13
35	حبال الود	14
37	أكنش اتمعيت	15
41	يا آه	16
43	طول عمرى	17
47	اكتبينى	18
49	وصيتى لإبنى	19
52	سيبينى	20
54	شوفونى	21
56	لوح تلج	22

60	نقطة	23
63	شبعان وجع	24
66	كنت باكدب	25
71	اشتقتك	26
72	وكان	27
74	لما تضحك	28
76	راحل	29
78	اسم مصر	30
80	إوعاك	31
83	من غير عتاب	32
86	لاء	33
87	أنا والحروف	34

93	راضى	35
97	محتوى الكتاب	36